

Saallicht geht aus.  
Schulalltag im Flur.

### 1.1 Jane und Ashley

Jane (am Handy)  
Mann Dillon. Hött isch Schüelerparlamänt – Was du chonnsch ned. Das wär jetzt s'füfte Mol hinder endand. Was?! Nei!  
(er legt auf)  
Mann. Hänkt eifach uf.  
Hoffentlich wird dä Typ Astronaut. Denn schüsst ihn d'NASA för mich of e Mond!

Ashley Jane!  
Jane Ashley!  
(schaut sie skeptisch an)  
Arbet?  
Ashley Ärger?  
Jane Jepp.  
Was bruuchsch?  
Ashley Ich wett i de nächschte Usgab vo de Wings, eusere Schüelerzäitig, en Artikel über d'Schliessig vo de 50 Schüelerparkplätz schriibe. Ihr händ doch im Schüelerparlamänt drüber diskutiert.

Jane Erscht hött Obig.  
Ashley Mischt.  
Chasch mir s'Wichtigscht denn chorz schriibe.  
Jane Aber das wird spoht.  
Ashley Keis Problem. För mich gitt's sowieso e Nachtschicht.  
Jane Ich lüüte dir hött Obig a. Isch guet?  
Ashley Das isch super.  
Jane (schaut auf ihr Handy)  
Was! Scho 8:55. Ich ha genau jetzt en Termin mit em Schuelleiter

Ashley Er wird de Präsidentin vom Schüelerparlamänt sicher ned de Chopf abriisse.  
Jane Hoffentlich ned.  
Es wär au schad om so ne schöne Chopf!  
(will abgehen)

### 1.2 Grace

(Grace tritt auf)

Jane (zu Ashley)  
Isch das ned d'Sis vom Dillon Collins?

Ashley Sicher. D'Grace. Die bescht Hochspringerin i ihrem Johrgang vo ganz Minnesota.

Jane Das isch die?!  
Ashley (nickt)

Jane Beschthöchi 1 Meter 80! Stell dir das vor.  
Lieber ned. Ich ha Höheangsch.  
(geht auf sie zu)  
Grace!  
(streckt ihr die Hand entgegen)  
Jane.

Grace Freut mich. Was gitt's?  
Jane Es goht om din Brüeder.  
Grace Was isch mit ihm?  
Jane Isch er chrank?  
Grace Was frogsch du mich?  
Jane Er hett mir grad vori am Telefon gseid, dass er ned cha a  
d'Schülerparlamäntssitzig cho. Aber mir besprichid hött die  
Sach mit de Parkplätz. Isch voll wichtig.

Grace Ond was hett das mit mir z'tue?  
Jane Chasch du ihn ned überrede, dass er hött Obig chonnt.  
Grace Ich?  
Jane Oder irgend öpper. Fröndin, Kolleg, Internetbekanntschaft...  
Grace Vergiss es. Im Momänt isch er voll schräg droff. Aber min Vater  
seid, das ränkt sich wieder ii. Do muess jede döre.

Jane Das heisst?  
Grace (zieht die Schultern hoch)  
Ich meine, ich chas probiere. Aber verspräche chan ich nüt.

Ashley (zu Jane)  
De Schuelleiter!  
Jane Ou Mischt! Sorry ich muess.  
(geht ab und ruft)  
Merci! Du schaffsch das.

Grace (mehr zu sich selber)  
Nimmt mich nor wonder wie. 1.81 überspringe isch vell einfacher  
als min Brüeder a die Schülerparlamäntssitzig z'bringe.

(geht zum Blackboard und schaut sich die Inserate und Zettel  
an.)

### 1.3 Charly und Nora

Charly Ashley. Wart chorz.  
Ashley Hesch d'Föteli?  
Charly Lueg. Die 50 Parkplätz os allne Perspektive. Sogar vom  
Schuelhuusdach abe.  
Nora Die han ich öbrigens gmacht. Mini Schwöschter isch ned  
schwindelfrei.

(Ashley schaut sich die Fotos auf der Kamera an.)

Charly Das interessiert jetzt niemer.  
Nora Das weiss mer nie.  
Charly Aber isch jo scho krass. Do bruucht d'Charles Lindbergh High  
School in Bloomington meh Stotz, ond of weli Idee chonnt  
d'Schuelleitig?

Nora Wott 50 Schüelerautoparkplätz a d'Fast Food Chetti mit em gäle M verchaufe.

Ashley Find ich gar ned schlächt.  
Charly (entsetzt)  
Was? Du findsch die Idee ned schlächt?

Nora Charly! Sie meint dänk s'Foti.  
Ashley Isch wöcklich ned schlächt.  
Charly Ned schlächt?  
Ashley Findsch ned?  
Charly Wieso fotografier ich för d'Wings?  
Nora Charly?!  
Ashley Wieso?  
Charly (schaut ein wenig verdutzt)  
Wotsch mi verarsche?

Ashley Wösst ned werom.  
Nora Charly!?  
Charly (schnappt nach Luft)  
Nora! Das isch jetz mini Sach!  
Es gitt... es gitt... es... Kennsch du öpper a dere Schuel, wo besser fotografiert als ich?

Ashley Nei.  
Charly Ond... ond du seisch, dass das Foti ned schlächt isch?  
Ashley Genau.  
Nora Charly, du bisch wieder einisch hongrig!  
Charly Was?!  
Nora Du bisch eifach ned du, wenn du hongrig bisch.  
(zieht ein Snickers aus der Tasche)  
Do. Nimm es Snickers.

Charly (beisst rein, geniesst den Schokoriegel, entspannt sich)  
Was wörd ich nor ohni dich mache.

Nora För öppis hett mer schliesslich en Schwöschter.  
Charly Oops. D' Julie *englisch* wartet sicher scho mit de Franz Ufzgi i de Bibliothek of mich. Ich muess.

Ashley Du meinsch d' Julie *französisch*  
Charly Egal. Hauptsach, sie hett d'Ufzgi.

(geht ab)

Ashley Jetzt wart doch of eus!  
Nora Mann, die isch hött wieder droff.

(die beiden gehen ebenfalls ab)

Während sie spricht, befinden sich die Personen, von denen gesprochen wird, auf der Bühne und spielen.

Grace (löst sich aus dem Hintergrund)

So lauffts bi eus a de Charles Lindbergh High School in Bloomington im Bundesstaat Minnesota. D'Charly wird i de Bibliothek d' Julie *englisch*, äh sorry, d' Julie *französisch* traffe ond vo ihre d'Franzuzfzgi abschriibe.  
(Julie tritt auf)  
(zum Publikum)  
Do chonnt sie öbrigens grad. Sie liist im Fall jedem för 3 \$ s'Schicksal os de Charte.  
D' Julie isch vor genau 92 Täg vo Montréal *deutsch* of Bloomington zoge.

Julie Montréal *französisch*!  
(zum Publikum)  
Sind Sie scho mol in Montréal gsii? Das isch en Stadt! Ned so wie Bloomington. Aber das isch leider onwichtig för eusi Gschicht. Es sind au ned alli 1000 Schüler vo dere Schuel gliich wichtig.

Grace Wichtig isch zom Biispill d' Jamie Caylen.  
(Jamie tritt auf, hört ein Hörbuch)  
A de High School nor bekannt onder ihrem Öbername Sky. D'Sky dänkt, was sie wott, und macht, was sie dänkt.

Julie Die ander Person, isch d'Olivia. Usnahmswiis einisch pönktlich. Fahrt öbrigens de geilschti Hippie Bus vo ganz Minnesota.

Olivia (Hält in der Hand ein Buch)  
Hey Sky! Sky!!!

Sky (zieht den Kopfhörer weg.)  
Oli, suechsch Stress? Ich lose grad es Hörbuech.

Olivia Chill ab, Alti.  
(reicht ihr das Buch)

Sky Wo hesch jetzt das gfonde?

Olivia Vori, binere Vollbräms isch es onderem Biifahrersitz vöre gschosse.

Sky Ich ha jo immer gseid es isch i diim Hippie Bus.

Olivia Han ich's det la legge?

Sky Easy. Alles Gucci.  
Scho Plän för's nöchschte Weekend?

Olivia Sorry, isch nüt mit Abchille im Blockhuus am See. Mini Eltere fiirid det ihre Hochzeitstag mit Kollege.

Sky (zieht zwei Tickets aus der Tasche)  
Wie wär's mit dem?

Olivia SHEER MAG? Die han ich scho lang mol welle go lose. Wo?

Sky In Minneapolis.

Olivia Am nöchschte Samschtig? Ich glaub, mich knutscht en Elch. SHEER MAG. Du bisch die Geilscht! Ich muess grad eis go dämpfe zom Abefahre.

Grace (zu Olivia und Sky)  
Halt! Halt!  
Ihr müend überneh.

Julie Ich muess dringend i d'Bibliothek. Mini Franzufzgi wartid druf, abschribe z'werde.

Grace Eusi Gschicht darf of kei Fall dörenand cho.  
Sky Klar ned.  
Olivia Wer fehlt no?  
Julie Eusi foif Cheerleaderinne.  
Grace Ond d'Victoria.  
Sky Okay. Keis Problem.  
Olivia S' Dämpfe wird verschobe.

(Julie und Grace gehen ab, die fünf Chearleederinnen treten auf und machen Fitnessübungen)

Chloe Common Girls, no ei Minute! Vollgas!

Sky De Drill Seargent met de Stoppuhr isch d'Fitnessassistentin, Chloe Peterson ond sälber Cheerleaderin. Bekannt för ihri Fitness of em Platz – ond im Bett.

Chloe Ned noche loh, girls!  
(zu Nicki)  
Ond du scho gar ned!

Nicki Was chan ich deför, wenn ich geschter ha müesse de Sophia ihri neue Cupcakes probiere.

Sophia Jetzt bin ich wieder schold. Ich ha jo ned gseid, du sellsch s'ganze Bläch ufässe.

Chloe 30 Sekonde!

Olivia D'Sophia Miller, bached die beschte Cupcakes in ganz Minnesota – Perle, säg ich nor – ond hasst of dere Wält nor eis:

Sophia Wenn's ossert mir nüt Süesses im Huus hett.

Sheyla Stressid eu! Soscht hänt d'Chloe weder e Zuesatzminute a.  
Chloe Super Vorschlag, Sheyla. Common girls. One more minute!  
Amanda Merci, Sheyla. Min Muskelkater wird dich för das liebe!

Sky De Fitnesslevel vo de Amanda Smith isch zwar wiit über mim, aber Tauchgang im Vergliich zo de andere.

Olivia Nor dank ihrem Vater, em Änglischnlehrer Barry Smith, hett sie ihre Platz i de Squad of sicher.

Amanda Usgrächnet hött han ich mis Dul-X ned debii.  
Chloe No 45 Sekonde!  
Nicki Die ewig Schinderei!  
Sheyla Schwitz nor echli. Mir müend dich nochhär jo weder dor d'Loff rüere. Ich bin froh om jedes Gramm, wo dir jetzt of e Bode tropft.

Nicki Moskle händ eifach Gwicht.  
 Sheyla Richtigi Moskle schwablid aber ned.  
 Nicki Wotsch du säge, dass ich fett bin?  
 Chloe No 30 Sekonde! Gas gäh! Soscht chonnt no e Minute obe  
 druuf!  
 ALLE Nei!  
 (alle erhöhen das Tempo)

Sky Nicki Mc'Clain, beshti Flyerin vo de Groppe aber leider keis  
 Flüügegwich. Osserhalb vo de Schuel de klassisch «couch  
 potato».

Chloe No 15 Sekonde!  
 Sheyla Aber gnau luege, Chloe.

Olivia Last but not least: D' Sheyla Shutterfield. Näbem Cheerleading  
 es Tennistalent i de Landeswahl. Ihri Eltere stönd  
 millioneschwer hinder ihre. Sie isch ihres Ein und Alles.

Chloe Ond STOPP. Merci vell mol.  
 (Victoria tritt auf)

Sky Ond das isch d'Victoria Weaver.  
 Olivia Die einzig Tochter vom Schuelleiter Ronald Weaver.  
 Sky Sie hett i de letschte Woche im Fach Sozialwösseschaft  
 intensiv anere vellbeachtete Arbet mit em Titel «Wie  
 funktionieren Jungs» gschaffet.

Olivia Fascht jede Typ vo de Schuel hett sie interviewt.

Victoria Okay. Bisch parat?  
 Frog 1  
 Bisch du scho mol schwächer gsi als es Meitli?  
 (Die Cheerleaderinnen werden befragt, spielen Jungs)

Amanda Jo. Aber ich ha so toh, als hätt ich's äxtra gmacht.  
 Victoria Frog 5  
 Wie lang sctohsch du am Morge im Bad?

Sophia Nie meh als foif Minute. Ond bisle sitzt ich immer.  
 Victoria Frog 26  
 Hesch du scho mol wäge Liebeschommer welle stärke?

Sheyla Jo. Aber dä Plan rüer ich jedes Mol wieder öber de Huufe,  
 wenn ich die nöchscht schön Frau gseh.

Victoria Frog 35  
 Sind Bröscht wörklich so wichtig?

Nicki Jajaja, ja ja. Ja. Bröscht! Soscht nüt!  
 Victoria Frog 41  
 Wieso bachid ihr eigentlich nie?

Chloe Will mer Fleisch brötlet.

Victoria

Mit mir sind mir alli.

Vierzäh.

Mir sind sitt em 27. Septämber onsichtbar mitenand verbonde.  
Verbonde dor en Erinnerig, wo sich om Ponkt 11:52 i eus ibrönnt  
hett - för immer.

Ev. Musik

LICHTWECHSEL

Alle stellen sich auf der Bühne auf.

Nora De Groch vo Nivea Gsichtschrème of de Huut vo minere Sis  
Ashley De Name Lindsey Morris  
Nicki Min Fahruswiis  
Julie Chicken nuggets mit Pommes  
Olivia die Gwitterstimmig am Himmel überem Parkplatz, wie i me  
Harry Potter Film,  
Sheyla min Brief os Florida, hellblaus Papier  
Charly de warmi Gebortstagskoss vo de Nora of minere lingge Bagge  
Jane de Blick über die ganz Kantine vo de High School  
Victoria das onagnähme Gfühl vonere Bloseentzündig  
Sophia das Erstuune, wie gern ich roti Spaghettisauce i anderi Täller  
schöpfe...

(Pause)

ALLE ...roti Spaghettisauce...  
(durcheinander)

Grace Jo.  
Plötzlich überall Spagettisauce,  
Chloe als hättis Tomate grägnert  
Amanda zmitt's i de Kantine  
Sky am 27. September  
om Ponkt 11:52  
Sophia Bis mir irgendeinisch klar worde isch,  
dass das of minere Hose gar kei Tomatesauce isch.  
Julie Tomatesauce isch heller.

Nora Of ei Schlag liggid all am Bode  
Ashley möchid sich onsichtbar  
hinder de Stahlsüüle  
Nicki omkippte Tisch, Stüel  
Chloe als wördid mir of es gheims Zeiche Versteckis spele

Sheyla Eusi Körper  
i listee Pfötze  
Charly matschige Pommes  
Jane Französischer Salatsauce  
Victoria ond wisse, onschuldige Papierserviette  
Grace am Bode verstreut  
Chloe ziellos dorenand  
Amanda wie im Herbscht,  
Sky im Wald  
wenn s'Blätter rägnet vom Hemu  
Amanda ond sie sich überenand bettid



Nora  
Ashley  
Nicki

nüt als zitterndi Embryos  
im Matsch vo Ässe ond Getränk  
schozlos usglefert

Julie  
Olivia

schockgfrore  
wie d'Ziit  
wo sich feschtbiisse hett  
am Jetzt,

Sheyla

dass das  
wo grad passiert  
gar ned cha sii

Charly

dass alles so bliibt  
wies immer gsii isch

Jane

aber s'Herz im Broschtchaschte  
hämmeret

Victoria  
Sophia  
Grace

raset  
explodiert fascht vor Angscht,  
dass es zom letsche Mol schloht.

UMBAUMUSIK  
LICHTWECHSEL

### 4.1 Kommentar

(Szenischer Umbau)

Nora De 27. September isch för d' Charles Lindberg High School gsii wie en Supernova.  
 Victoria E Knall - ond die ganz Wält hett plötzlich gwösst, dass es en Ort wie Bloomington in Minnesota gitt.  
 Nora För d' Medie e super Story.  
 Victoria Die läbid jo vo de Tote.  
 Nora Sofort händs wie vergiftet noch Grönd gsuecht.  
 Victoria Wie wärs mit eme gamesöchtige Täter?  
 Nora Oder no besser: E schlächt gfüerti Schuel.  
 Victoria Katastrophale Familienverhältnis?  
 Nora Uuuuu! Sehr guet.  
 Eifach nüt komplizierts.  
 Victoria Nei. Nüt komplizierts. Das verchauft sich jo ned.

(Pause)

Victoria Aber es isch kompliziert.  
 Nora Wenn's eifach wär...  
 Victoria ...wär das nie passiert.  
 (schaut zu Nora)  
 Oder ned? Ich meine, du hesch ihn guet könnt. Du bisch mit ihm zäme gsii.

### 4.2 Dillon macht Schluss

Nora verlässt den Platz und setzt sich mit Julie mitten auf die Bühne. Nora ist in sich gekehrt. Sie weint, Julie versucht sie zu trösten.

Grace Mann, do sind ihr!  
 Mir händ doch im Applebees abgemacht. Ich hocke det sitt ere halb Stond vor mim tripple chocolate meltdown ond luege zue, wie das geile Teil verlaufft.  
 Julie De Nora isch es grad ned om Dessert.  
 Grace Jo was macht mer i some Fall im 21. Johrhundert?  
 (schaut die beiden an, es kommt keine Antwort)  
 Mer schriibt e chorzi Nochrict ond guet isch.  
 Mann. Was isch los?!  
 Schlimm oder schlimm?  
 Nora Schlimm.  
 Julie (zu Nora)  
 Wotsch es sälber säge?  
 Nora (schüttelt den Kopf)  
 Julie Er hett Schloss gmacht.  
 Grace Wer?  
 Julie Wer? Din Brüeder dänk.

Grace De Dillon hett mir de Nora Schloss gmacht?  
Spinnt's dem?!

Nora Er hett gseid, dass ich ned zo ihm passe. Dass sowieso niemer zo ihm passt. Ond dass ich ihn sell in Rueh loh. För immer.

Grace Hett's jetzt dem is Hirni gschneiet?!  
(sieht, dass Julie eine ihrer Taschen umgehängt hat.)  
Ond was sell mini Täsche?

Julie De Dillon hett alli Sache do drii gstopft, wo sie ihm einisch gschänkt hett ond ihre a de Huustöre vor d'Füess grüert.

Grace (zückt ihr Handy)  
Dere Essiggorke lüüt ich grad a.

Nora Grace! Vergiss es! Das isch endgöltig.

Grace Endgöltig?  
Es Wort vo siinere Sis ond er überleid sich die Sach nomol.

Nora (nimmt ihr das Handy weg.)  
Es gitt nüt meh z'überläge.  
Er hett mich a de Huustöre grad so öppis vo verletzt. Ond das ned s'erschte Mol. Ich wott nömm!

Grace Aber...

Julie ...loh jetzt d'Nora. Compris?!

Grace (setzt sich hin, Julie wühlt in der Tasche.)  
Aber was isch denn passiert? Mir sind doch grad geschter no zäme im japanische Garte gsii.

Nora Ich weiss ned. Er wird immer komischer. Onzuegänglicher. Ich ha eifach s'Gfühl, es bedrückt ihn öppis, oder er isch enttäuscht.  
Aber er seid immer, es isch nüt.  
Aber wenn ich i de letschte Woche nor es paar Minute z'spoht cho bin, denn hett er mich usgfrogt, was ich gmacht ha, mit wem das ich zäme gsii bin. Ich hasse das. Er hett mer immer weniger vertraut. Immer weniger.

Julie (zieht ein Plüschtier hervor)  
Jöh, so händig! Das hesch du ihm gschänkt?

Nora Julie! Ich schiiss grad of alli Gschänk.

Julie Oh pardon.  
(stopft es wieder zurück)

Grace Ond jetzt?  
(Pause)

Julie Wie wärs mitere feine Latte Macchiato mit Caramelgschmack bi mir deheim? Wenn du wotsch, legg ich dir sogar dini Schicksalscharte.

Nora Macchiato isch okay. Aber bitte kei Schicksalscharte. Mis Schicksal nimm ich sälber i d'Händ.

Julie À ton avis.  
Wie wär's mit ere neue Folg vo walking dead?

Nora Macchiato ond walking dead? Ond mini zwee BFFs? Das isch definitiv meh als ich i minere beschisseni Situation cha wönsche.

Grace Ich bi debii. Hauptsach es hilfft.  
(zu Julie)  
Gitt's die Macchiato au mit Vanille Gschmack?

Julie Pas de problème.

Grace No besser.

(die drei gehen ab)

### 4.3 Kommentar

Olivia D' Star Tribune, d' Ziitig vo Minnesota, chonnt drüü Täg noch em  
Attentat of die glorrichi Idee, es Foti vo de Nora mit em Dillon  
äng omschlange z' veröffentliche.

Sheyla De Titel: Aus Amor wird Amok.  
Olivia Ich meine, wie behinderet isch das denn. Sell jetzt d' Nora a  
allem Schold sii?

Sheyla Grad d' Nora, wo extrem glitte hett onder dere Trännig.  
Olivia Sie isch so down gsii, dass sie es paar Täg noch de Trännig es  
Auto chlauet hett und abghaue isch.

Sheyla Chorz vor Chicago händ sie Bulle verwötscht.  
Olivia D' Strof vom Jugendrichter: 50 Sozialstunde.  
Sheyla Sie hätt jo au chönne om sich schüsse? Oder ned?

Lichtwechsel  
Musik

**5.1 Kommentar**

(Szenischer Umbau)

Amanda De Dillon Collins isch no im Januar 2016 so öppis wie en Star gsii.  
 Er isch of de Titelsiite vo de „Wings“ abbildet gsii. Of de Titelsiite!  
 Sky Fame pur a eusere Schuel.  
 Amanda Meischtens schaffids nor Sporttalänt...  
 Sky ...oder talentierti Sportler...  
 Amanda ...oder Sportler mit Talänt of d'Titelsiite.  
 Sky Was mer jetzt vom Dillon überhaupt ned hed chönne  
 behaupte. Ich weiss, vo was ich rede, schliesslich han ich ihn im  
 schueleigene Schüssclub betreut.  
 Amanda Aber im Läbe gitt's Zuefäll. So wie dä.

**5.2 Redaktionssitzung „Wings“ Januar 2016**

Charly Ashley! Mir planid di neu Usgab vo de Wings und du wotsch  
 scho wieder Sportler of d'Titelsiite.  
 Ashley Aber d'Läser liebid's. Es wirdid sogar heimlich Wette  
 abgeschlosse, wer's of s'nöchste Titelblatt vo de Wings schafft.  
 Charly Aber bitte ned eusi Frauefuessballmannschaft.  
 Ashley Die isch aber extrem erfolgrüich.  
 Charly Bitte mol öppis Neus.

(es klopft an der Tür)

Ashley Mach en Vorschlag.  
 Charly D' Schüeler wählid heimlich de beliebtischti Lehrer. De Sieger  
 vo de Wahl chonnt denn of's Titelblatt.  
 Ashley Das isch en Schüelerziitig, Charly.  
 Charly Ebe.

(es klopft nochmals)

Ashley Hesch du s'Schildli BITTE NICHT STÖREN ned ufghänkt.  
 Charly Sicher.  
 Ashley Niene hett mer sini Rueh.  
 (gestresst)  
 Herein!

(Chloe betritt das Zimmer)

Chloe Sorry för d'Störig. Aber ich han mis Handy verleit.  
 Charly Mir sind au grad am Sueche.  
 Chloe Was händ ihr verlore?  
 Ashley Mir suechid Titelstory för d'Januar Usgab vo de Wings.  
 Chloe Nämüd d'Frauefuessballmannschaft. Of die han ich gwettet.

Ashley Charly Was han ich gseid.  
Aber das isch doch langwiilig. Jedes Huehn wettet of die.  
(Chloe schaut sie etwas verduzt an.)  
Äh sorry. Ich han ned dich gmeint.  
Was isch eigentlich mit dem Dillon, won ich sett Woche muess fotigrafiere?

Ashley Chloe Das gitt en Reportage öber ihn ond de Schüssclub.  
Chloe Mann. Ich glaub's eifach ned. Das Ding isch nienet!  
Ashley (zu Chloe)  
Okay. Vielleicht chonnt's ned suuber öbere, aber mir sind zmitt's inere wichtige Sitzig.

Chloe Sorry. Ich bi jo scho weg.  
(will gehen)  
Aber Schüssclub find ich voll Scheisse.

Charly Wieso das?  
Chloe Schüsse isch eifach kei Sport!  
Ashley Wenn du min Artikel wörsch läse, denn...  
Charly ...das isch es!  
Ashley Was?!

Charly Mir nämid d' Reportage mit em Dillon ond tüend ihn of Titelsiite.  
Ashley Wieso?  
Charly Die Reportage wird z'rede gäh. Das wänd mir doch.  
Ashley Scho. Aber die isch z'chorz.  
Charly (zu Chloe)  
Wie heiss isch?

Chloe Chloe. Chloe Peterson.  
Charly Chloe isch gäge das Schüsszügs. Mir erwiiterid d' Reportage mit Stimme vo Gägnerinne.

Ashley En Pro und Contra Teil?  
(überlegt)  
Das chönnt fonktioniere. Hesch grad Ziit?

Chloe Ohni Handy han ich endlos Ziit.  
Ashley Okay. Nimm Platz.  
(Charly reicht Ashley eine Kopie der Reportage)  
Mir lesid dir es paar Ussage vom Dillon vor, won er i de letschte Mönet gmacht hett. Du seisch, was dir dezue ifallt.

Chloe Spontan?  
Ashley Voll spontan.  
Chloe Genau mis Ding.  
Charly Okay. Ussag 1. Momänt... do.  
»Ich würde später meine Familie auf jeden Fall mit einer Waffe verteidigen, wenn es sein muss.«

Chloe Das isch doch reini Schiinsicherheit. Ond wenn er ned grad ome isch? Was denn? Super.

Ashley »Schiessen gibt mir ein gutes Lebensgefühl. Es macht mich selbstsicherer.«

Chloe Mir gitt's es schlächts Gefühl, wenn ich weiss, dass es Type gitt, wo en Knarre bruuchid, om sich besser z'fühle.

Charly »Es gab in der Steinzeit schon Todesfälle durch Waffen. Das gehört seit jeher zur Menschheit.«

Chloe So wie Dorchfall, Hueschte oder Fieber? Hallo?! Todesfäll dor Waffe ghörid nor zor Mönschheit, will de Mönsch mit so Züügs ned cha omgoh. Drom: Finger weg!

Ashley »Keiner wird als Mörder geboren. Man wird zum Mörder gemacht.«

Chloe Vollträffer. Dromm gib niemerem e Waffe i d'Hand.

(Charlys Handy gibt ein Signal)

Charly De Mr. Smith wartet im Lehrerzimmer mit de Korrektüre vom Artikel über d'Frauefuessballerinne.

Ashley Super.

Chloe Chönnnd mir das Interview morn wiiterfüere?

Chloe Wenn?

Charly Am Zwölfi i de Kantine?

Chloe Super. Aber am halbi eis gohn ich go jogge.  
(schlägt sich an den Kopf)  
Mis Handy! Ich has sicher i de Jogginghose. Ich muess sofort zo mim Spind.

Ashley Okay, denn bis morn.

Charly See you. Ond nimm no es paar Kolleginne mit! Jedi Meinig zällt.  
(alle drei gehen ab)

### 5.3 Kommentar

Sky Kei Mönsch hett im Januar 2016 of de Dillon Collins gwettet. Wieso au. Mer hett ihn jo ned könnnt. Ossert mer hett de gliich Stondeplan gha wien er.

Sheyla E graui Muus im Schuelalltag, meh ned.

Sky D' Reportage »in der Ruhe liegt die Kraft« hett igschlage wie en Bombe. Mit eim Schlag isch de Schüssclub s'Gsprächsthema Nommere eis gsii.

Sheyla De Schüssclub – aber ned de Dillon. Ihn hett mer grad wieder vergässe.

Sky Sinere Schwöschter Grace hett er einisch gseid: «Ned emol of de Titelseite wird ich beachtet. Ich bi de Niemer im Nüüt.»

Sheyla E wiiteri Enttüschtig i sim Läbe.  
Hett sie de Ussschlag gäh zo siim mörderische Plan?

Sky Wer weiss.

FREEZE  
Umbaumusik

## Szene 6

## Das Attentat

Alle versammeln sich auf der Bühne. Es ergibt ein stimmiges Bild, ein eingefrorener Moment. Wer spricht bewegt sich.

- Jane Kantine vo de Charles Lindberg High. Platz für ongefähr 500 Persone. Es isch Mäntig, de 27. Septämber, chorz vor zwölfi. Näbe mir d'Grace.
- Grace D'Jane frogt mich grad, ob ich mim Brüeder scho gschriibe ha, wägem Schülerparlamänt. Klar han ich das, aber er isch i letschter Ziit nie online. Ich lüüte ihm jetzt a.
- Olivia Ich bin zo däm Ziitpunkt dosse of em Schülerparkplatz i mim Hippie Bus ond lose Janis Joplin. Perle, Alte. Ich bi wieder einisch too late. Of jede Fall gsehn ich, wie de Dillon vor em Kantineingang e Sporttäsche ufmacht, e Knarre uspackt, sich d'Sporttäsche wieder omhängt ond i de Kantine verschwindet.
- Nicki Ich ha am Friitig mini Autoprüefig bestande. Das isch min Fahruuswiis. Krasses Gefühl. Ond dosse of em Parkplatz mis Auto, e Ford Fiesta, dark blue.
- Sophia Im Fach Sozialwösseschafte hett hött eusi Klass mit em Projekt **Füreinander** gstartet. Min Job isch es, i de Kantine bim Menü 5 Tomatesauce über d'Spaghetti z' schöpfe.
- Julie Ich grad näbe ihre. Menü 6: Chicken nuggets mit Pommes.
- Charly Ich stoh mit em Rögge zom ligang, will ich es Selfie mit minere Sis mache. Es Gebortstagsselfie. Wirsch schliesslich nor einisch 15ni.
- Nora Ich dröcke minere Schwöschter e Schmotz of d'Bagge. Ich liebe d'Charly. Ohni sie wär ich nüt.
- Victoria Ich ha wieder einisch mitere Bloseentzündig z'kämpfe. Ich bin am Wochenänd i See go schwimme, ändi Septämber. Jetzt han ich de Seich. So bin ich of em diräkte Wäg zom WC.
- Amanda Ich begägne de Victoria ond mache ihre es Komplimänt wäge ihre Hose. I de Hand han ich es Spargel-Avocado-Rentier-Sandwich vo mim Dad. Mäntig isch euse Sandwichtag. Er hett erscht of 10ni Schuel. Denn macht er mir immer es Sandwich noch mim Wonsch ond gitt mirs am Mittag.
- Sky (hebt den Kopfhörer leicht an)  
Hörbuech.
- Chloe Ich bi am Handy. Ich checke mini Date vom Fitness tracker. 59 Täg am Stück über 12'000 Schritt. Min Ruhepols liit aktuell bi 39. So fit bin ich no gar nie gsii.
- Ashley Ich bi mit de Star Tribune beschäftigt. Todesanzeige. Les ich zwar normalerwiis nie, aber d'Lindsey Morris isch mir is Aug gstoche. 4 Jahr, 3 Mönat ond 2 Täg alt. Kräbs. Vell z'jong zom Stärke, han ich dänkt.
- Sheyla Ich bin so glücklich! D' Uffangstation für chranki Seehönd in Florida hett mich als Praktikantin für die nächste Sommerferie usgwählt. Mich! Jetzt muess ich das norno mine Eltere biibringe.

TEMPOWECHSEL

- Jane Denn en Knall.